

2. **TRICHOPILIA BRASILIENSIS** Cogn. pseudo-bulbis aggregatis, satis parvis, lineari-oblongis, paulo compressis; foliis crasse coriaceis, subsemicylindratis, lineari-ligulatis, dorso convexis, antice profundiuscule canaliculatis, longe acuminatis, inferne longe attenuatis; pedunculo communi gracillimo, pendulo, foliis multo brevioribus, superne laxe trifloro; bracteis membranaceis, triangulari-lanceolatis, breviter acuminatis, basi vaginantibus, ovario satis brevioribus; floribus satis parvis, breviter pedicellatis, segmentis membranaceis, patentissimis; sepalis subaequilongis, lineari-lanceolatis, longiuscule acuminatis; petalis ligulato-lanceolatis, breviuscule acuminatis, sepalo dorsali paulo brevioribus; labello patulo, basi cum columna breviuscule connato, late ovato, margine integerrimo undulato-subcrispulo, apice subabrupte acutiusculo, basi subrotundato, cochleato, utrinque glaberrimo, sepalis lateralibus satis brevioribus, disco non costato, ima basi transverse calloso, callo marginato, antice acute unidentato; columna satis gracili, teretiuscula, utrinque sub clinandrio mutica, labello dimidio brevioribus; clinandrio profunde cucullato, non lobato, margine erecto minute serrulato.

Tabula nostra CXX. Fig. III (habitus cum analysi).

RADICES fasciculatae, breviusculae, graciles, simplices. **PSEDOBULBI** satis numerosi, erecti vel erecto-patuli, recti vel vix arcuati, laeves, 2 ad 3 cm. longi, 3—5 mm. crassi, **VAGINIS** pluribus tenuiter membranaceis brevibus arcte adpressis obtusisque vestiti. **FOLIA** plus minusve patula, satis arcuata, satis concava, 10—11 cm. longa, 7—9 mm. lata. **PEDUNCULUS** communis valde arcuatus, teretiusculus, laevis, 4—5 cm. longus, vix 1 mm. crassus. **PEDICELLI** erecto-patuli, gracillimi, recti vel paulo arcuati, cum ovario lineari obtuse trigono 7—10 mm. longi. **BRACTEAE** erecto-patulae, valde concavae, 6—7 mm. longae. **FLORES** erecto-patuli, albo-hyalini, rubro-punctati. **SEPALA** satis concava, 14—15 mm. longa, 3 mm. lata, lateralia subfalcata. **PETALA** paulo concava, inferne leviter attenuata, plus minusve torta, 13—14 mm. longa, 3—3½ mm. lata. **LABELLUM** erectum vel erecto-patulum, valde concavum, 10 mm. longum, 8 mm. latum. **COLUMNA** leviter incurva, inferne satis attenuata, 5 mm. longa.

Habitat in arboribus ad Araguay prov. Goyaz: G. Edwall. — Floret Januario.